

Pladojee fer die Ferderung vum pälzische Dialekt

Isch wes nett, wie´s Ihne oder eich gehe dud, aber isch beobacht, dass immer wennischer Pälzisch rede duen. Mer scheint, bsonners die Junge duen heitz´dag iwverwiegend Hochdeitsch unneranner babble. Mer Pälzer fallen leicht ins Hochdeitsch, selbst won mer mit Leit z´samme sinn, wo all Pälzisch fe´stehe duen. Mer geht´s ach manchmol so. Moin Oidruck vum Rickgang vum Pälzische Dialekt werd durch die Oistufung vun der Gesellschaft for bedrohde Sproche bschädichd, wu es Pälzische als g´färdeder Dialekt oistuft. De Rudolf Probst, der wu e Buch iwwers Pälzische gschriwwe hot, schätzd, das mit jeder neie Generazion des Pälzische 9% vun soim Wortschatz verliere dud.

Friejer war ma zum Beispiel in de Schul a ziemlich negadiv gejeiwwer Dialektde oig´schdelld. De Schullehrer Maddin, bei dem ich selbscht Unnerrischd gahbt hab, wird mer des beschädische kenne. Wie de Zwilling's Schorsch gesahd hot, der jo grad zum Lehrer ausgebild werd, is mer heit nemmi so negadiv oig´schdelld.

Guggt mer sich in Regione um, wu die Dialektde schon fascht ve´schwunne sin, zum Beispiel in Nord-Deitschlond, schdelld mer fescht, dass die Leit des im nochhinein bedauern. Jezzert dud mer dort ve´suche, de Kinner widder de regionale Dialekt beiz´bringe. Des wirrgt uff mich irgendwie kinstlich und isch glab nedd dro, dass des vun viel Erfolg gekräht sei werd.

Isch ded es besser finne, nedd doededruff zu waade, bis fascht kenner mer Pälzisch babbelt, sonnern, wann mer vorher was unnernumme due deden, um unsern eischene Dialekt zu erhalte. Desweje halt isch des Pladojee.

Dialektde schaffen regionale Identität, die in em Europa der Regione vun Bedeitung is. Vor allem is än Dialekt vor misch awwer e lebendisches kulturelles Erwe. Do sellt mer net ausschließlic rationale G´schischdpunkte ansetze. De Gloggestä uff em Roxmer Friedhof, a dodes kulturelles Erwe, losse mer jo a net verloddre, owohl´s uns blos Geld koschd. Un bei de Erkebert-Ruin in Frankedahl wers billischer, se äffach abzureiße. Mer kennt sogar a Kaufhaus hinstelle, des Geld un Schteier bringe däd. Awwer isch glab, die wennigschde deden des gut finne. So iss es ewwe ach mit em Dialekt. Zwar due mer uns blos unneranner ve´sche, awwer er kehrt halt zu unserer Region. Wann mer blos noch druff gucke duen, was in unsrer leischdungsorientierte Gesellschaft gefordert werd, dann breischd mer blos noch Englisch oder Chinesisch lerne, Mole und Singe wären u`nedisch.

Un um des vun vornerein klar zustelle: es geht mer nett um endwedder Pälzisch oder Hochdeitsch, sondern um a sowohl als ach.

Heit solle mer jo erschtmol dribber abstimme, ob mer Pälzisch voor erhaltenswert halten und bereit sinn, ach dedevor einzustehe. Was und wie dann konkret unnernumme werre kann un soll, des is dann später zu entscheide.